

## **Pi comu lu dissi**

Nun ti nnamurari ma di na fimmina  
picciuttedda e cchiù giovani di tia,  
su stangati forti e amari, tutti pi tia,  
peggiu ancòra si ti fa troppu simpatia.

Si duci duci ti talia e t'arridi,  
nun ci fari tantu affidamentu  
ti fa capiri ca cci putissi stari  
è la trama pi fàriti nnamurari.

Sta picciuttedda giovani maritata  
pari a tia ca l'avissitu cunquistata  
tu va oltri lu to cori e la fantasia  
e sicuru cci dici di fari l'amuri cu tia.

Cu l'occhi luciti a pampinedda  
e la vacca cu lu suriseddu, ti dici:  
"Nun po èssiri, ma chi sta dicennu"?  
Iu si nun mi tiniva stava cadennu!

Pi comu lu dissi parsi ca dissi di si.  
Comu! Allora sti surrisi, sti carizzi,  
st'occhiaturi maliziusi d'nnamurata  
chi èranu tutti di la me menti malata?

Va capisci sti fimmini comu su?  
Prima ti fannu tuccàri lu celu cu li manu,  
po nveci dicinu ca si tu ca capisti mali  
e po ti dicinu ca la taliata è normali.

Pinzannu ca fineru tutti cosi, mi cuitavu  
la testa e lu cori. Dopu ti la ritrovi davanti  
ca ti smurfia, ti talia, t'arridi e t'accarizza.  
Allura tu penzi, ora stu chiovu s'appizza!

Ma quali? Nun cc'è cchiù munnu, allora  
penzu, sicuru ca rimbambivu, rincretinivu,  
rincitrullivu, stunavu propriu di tunnizzu  
mi sonnu, scrivu tanti fissari e puitizzu.

Lu veru fattu è ca la fimmina è birbanti  
ti lassa cu l'occhi chini e li mani vacanti.